

**Minister di Transporte, Integridad, Naturalesa  
y Asuntonan di Adulto Mayor**  
**Sr. Ursell Arends**  
**Bestuurskantoor**  
**Presente**

Aruba, 2 juni 2023

**Respetable Sr.Minister,**

Durante e ultimo luna(nan) henter nos comunidad a tuma nota con pensamentonan, vision opuesto entre Gobierno di Aruba y SABA a escala. E situacion aki tambe a toca trahadornan di Fundacion SABA.

Cada partido riba su punto, cu razon of no, problema a keda escala. Manera tabata di spera, tur esaki a conta cu reaccion di un contra otro, cu argument, razon si of no, pero cu na final e discusionnan aki den prensa, for di mesa di dialogo no ta juda na crea un ambiente fertil pa solucion. E problematica mes te dia di awe ta sin solucion.

Nos ta para akian cu e meta pa urgi Sr.Minister habri e caminda pa dialogo y solucion. Maneho y Cuido di nos grandinan ta demasiado importante pa nos keda debati den prensa sin por avanza.

#### **Transparencia rond di dunamento subsidio**

E problematica di subsidio entre Gobierno y SABA, si tin dunamento di cuenta si of no, of si esaki a bai di acuerdo cu reglanan vigente, si uso di subsidio a bai pa e meta destina si of no, y asina nos por menciona mas, ta puntonan cu nos tur ta kere cu mester wordo aclaria. Pero esakinan ta temanan cu mester wordo atendi y clarifica na mesa di dialogo. Pa cu esaki nos ta pidi pa transparencia di tur esnan involvi. Subsidio ta placa di pueblo, y tur esnan cu ta ricibi fondo di pueblo mester por splica ampliamente con e placa ta wordo usa. Pa cu esaki Sr.Minister hunto cu tur departamento di gobierno ta responsabel pa e maneho y rendimiento di cuenta ta uno transparente.

#### **Resultado “documentenonderzoek”**

Tin un grupo di trahador na SABA cu te ainda no a ricibi nan placa di e asina jama “rechtstrekking”. A duna Sr.Minister tur espacio pa hasi un investigacion pa asina bin claridad unda e placa di ‘rechtstrekking’ ta of a bai.

Mientras cu ta conoci cu e resultado tey, si SABA y Gobierno di Aruba no atende e resultado aki, trahadornan lo no haya e pago di rechttrekking. Pa awor nos ta wak cu cada uno ta tira culpa riba otro. Pues ta parece cue lucha y espera pa e investigacion ta envano pa e trahadornan concerni.

### **Nos ta exige un Maneho y cuidu transparente pa nos grandinan**

Ta importante pa nos tin un vision comun di bida, un vision politico di con nos ta wak e futuro di nos pais riba e tereno di maneho y cuidu di nos grandinan.

Esaki mester representa un perspectiva di un politica nacional comparti, democratic, rondona y seya pa e principio di dignidad.

Nos por mira cu na Aruba tin un demanda fuerte pa cu e servicio di cuidu. Te cu poco ta wordo menciona di un lista di espera di como 170 adulto. Ta hopi tristo pa nos por acepta existencia mes di un lista di espera. Ta adulto y famianan cu mester di sosten di un pais.

Nos ta exige pa a corto plazo por tin discusion habri cu diferente 'stake holdersnan' riba e tema aki.

### **Ta fundamental pa reconoce y visibiliza e labor di cuidu**

Nos hendenan, nos grandinan mester por biba cu dignidad y e trahadornan tambe merece un salario digno. Ta parece cu awor a bira normal cu mester keda mendiga pa cumplimiento cu obligacionnan pa cu trahador. Y e problema aki ta sosode den hopi fundacion. Ta facil bisa e trahador cu no tin placa, bai busca na gobierno. Y e ta parece un 'modus operandus' tambe door di caba cu full e subsidio y ora ta toca e trahador placa a caba.

Pero den añanan anterior, prome cu introduccion di Outputsubsidie, a adverti gobierno di e risiconan aki. Asina mes a impone riba fundacionnan mientras cu e base legal pa sostene esaki tampoco ta existi.

Sr.Minister nos ta:

- exige claridad riba cumplimiento cu pago di "rechttrekking". Despues di a bin ta warda pa basta aña caba, ta tempo awo si pa cumplimiento.
- un forma nobo, diferente y transparente unda ta regla y garantiza cu derecho di trahadornan ta keda garantiza y cumpli.
- pidi pa Gobierno di Aruba hasi esfuerzo maximo pa hunto cu SABA yega na mesa di discusion y pone riba mesa loke ta diferencia y distancia otro. Esaki cu e meta pa dialogo y solucion.
- exige pa pais Aruba garantiza existencia di un maneho husto y transparente riba tereno di cuidu di nos grandinan sigur pa SABA por sigui brinda su servicionan;
- exige pa e maneho pa cu cuidu di nos grandinan ta wordo sostene cu su financiamiento debido y no pa ta suheto ta cortamento di e presupuesto. Solamente asina nos lo Avanza cu pasonan grandi of menor, semper y cuando e ta cla na unda nos kier yega y segura cu cada pieza y accion ta consistente cu e vision di largo plazo y ta consistui un avance na nos obhetibonan.

- pa a corto plazo nos ta ricibi reaccion y solucion riba e pago di e rechttrekking pero tambe riba e impasse reinante entre Gobierno di Aruba y SABA.

atentamente,

~~Den nòmber di trahadornan SABA,~~

~~miembro di SEPPA~~

Magaly Brito, Secr.General